

ELA. Sindikatuko batzorde nazionalak atzo goizeko bileran aztertu zuen EAeko lehendakariaren ekimena

ELAk ontzat jo du ekimena, baina jarrera aldatzeko eskatu dio Ibarretxeri

Sindikatuak auzitan jarri du Jaurilaritza konfrontazio demokratikorako prest ote dagoen

Humberto Unzueta | BILBO

ELA sindikatuak argi-ilunak ikusten dizkio Ibarretxeren proposamenari. Herenegun EAeko lehendakariaren ahotik egitasmoaren nondik norakoak aditu ondoren, atzo German Kortabarría sindikatuko Komunikazio arduradunak «interesgarritzat eta positibotzat» jo zuen proposamena, baina jarrera politikoa aldatzeko eskatu zion Ibarretxeri, eta Espainiako Estatuarekin konfrontazio demokratikoa izatearen alde agertu zen.

Sindikatuak batzorde nazionalak atzo goizean aztertu zuen egitasmoa bera eta bezperan Ibarretxerekin izandako bilera. Egungo esparrutik ateratzeko «aukera» ematen duen heinean, egitasmoak «mugarri politiko berria» ezartzen duela uste du ELAk.

ELAren iritzirako, egitasmoak gabeziak ditu edukietan eta prozeduran, eta zalantza bat baino gehiago aurrera eraman ahal izateko. Kortabarríaren hitzetan, «proposamenak jite soberanista izango badu, Ibarretxeren gobernuak ezin dio eutsi Kontzertu Ekonomikoan edo eskumenei buruzko tirabiretan agerturiko jarrera politikoari».



MONIKA DEL VALLE / ARGAZKI PRESS

ELAko batzorde nazionala atzo goizean batzartu zen Ibarretxeren egitasmoa aztertzeko.

Kortabarríak esan zuenez, Ibarretxeren egitasmoak kontraesanak ditu, «legea betetzeko konpromiso argia egiten duelako baina ez duelako argitzen zer egingo duen legitimitate demokratikoak legearekin

talka egiten duenean». ELAk konfrontazio demokratikoan ikusten du irtenbidea, baina auzitan jartzen du Ibarretxek orain arteko bidea aldatu eta jarrera aldatuko ote duen.

Adibide gisa, transferitu ga-

beko eskumenen auzia aipatu du: «Ertzaintza zabaltzeko proposamenean izan ezik, Estatuarekin talka egitea saihesten da, eta beste neurri instrumentalekin ordezkatu».

Egitasmoaren inguruan bil-

ESANAK

GERMAN KORTABARRIA
(ELAko Komunikazio arduraduna)

«Egitasmoak mugarri politiko berria ezartzen du, egungo esparrutik ateratzeko aukera ematen duelako»

«Ekimenak jite soberanista izango badu, Ibarretxek ezin dio eutsi Kontzertuan agertu duen jarrerari»

«Ez dago argi Ibarretxek zer egingo duen legeak legitimitatearekin talka egiten duenean»

dukako indarrei gutxi iritzita, ELAk egungo aliantzak zabalatzeko beharra ikusten du. «Aliantza zabalagoak lortzeko baldintza eta borondaterik ez dagoen artean» ekinbideak ez duela arrakastarik izango uste du sindikatuak.

Lurraldetasunari dagokionez, ELAk dio ekimena «printzipio egokietan» oinarritzen dela, baina konpromiso politikoak «Jaurilaritzaren esparrura mugatzen» direla salatu du. Gauzak hala, nazio ikuspegia aintzat hartuko duen estrategia beharrezko ikusten du prozesuari «jite nazionala» emateko.

ELKARRIZKETA TXANDA. Ibarretxe lehendakaria unibertsitateetako errektoreekin eta EHNE eta Enba sindikatuarekin batzartu da

Monterok uste du Ibarretxeren proposamenak ez duela balio ETaren indarkeria konpontzeko

Edurne Begiristain | GASTEIZ

Euskal Herriko Unibertsitateko (EHU), Deustuko eta Mondragon Unibertsitateko errektoreekin batzartu zen atzo goizean Juan Jose Ibarretxe lehendakaria, bere proposamena aztertu eta eztabaidatzeko asmoz. Arratsaldean, berriz, EHNE eta Enba nekazari sindikatuarekin ordezkariak hartu zituen Lehendakariaren bilera.

Goizeko bilera amaituta, EHuko errektore Manuel Monterok lehendakariaren proposamenaren balorazioa egin zuen komunikabideen aurrean. Haren ustez, Ibarretxeren bizikidetzarako itun berriak «ez dio erantzunik ematen euskal gizar-

teak duen arazo nagusiari, alegia, indarkeria terroristari eta ETaren existentziari».

Monteroren aburuz, Gernikako Estatutua hitzartu zenean lortutako «adostasun demokratikoa» erdiestea izango litzateke gaur egungo egoerari irtenbidea emateko «aukera bakarra». Izan ere, haren irudiko, orain ez dago euskal herritar gehienek babesa duen proiekturik.

Halaber, egun Euskal Herriaren egoera «larriaren» inguruan duen «ardura» helarazi zion Ibarretxe lehendakariari. Era berean, adierazi zion egoerari irtenbidea emateko bide bakarra «demokraten arteko eztabaida» dela.



RAUL BOGAJO / ARGAZKI PRESS

Jose Maria Abrego (Deustu), Inaxio Oliveri (Mondragon) eta Manu Montero (EHU), atzo, Ibarretxerekin.